

## دوبیتی های ناب هزاره گی

مه قوربانت شوُم ای پیرو گولدار  
بیایکی ما و تو بوریم دَ مازار  
دوسه بوسه بیدی از زیر چادر  
خودا از ماو تو قبول کنه یار



الا ای بچه ی خُوردِ کلان کار  
نمی شی تا سحر از خواب بیدار  
توره دکاری آشوقی چی کاره  
بُجول بازی بُورو دشار وپازار



مه قوربانت شوُم کورته گول نار  
بیدی بوسه کی گاو توره کنوم بار  
الی نه بوسه می دوم نه کو گاو بار  
مره شرمه توره ننگه ازی کار



چطور خوش خوش موره دَبله شُود یار

آدم بـلیبور آشوق هوشیار

آشوق بد رفت و آمد موکونه

زده ما آشوقه ملامد موکونه



آدم بـلیبور آشوق هوشیار

منه مردوم آدمه موگه زوار

اگه درشی بوگی منده نباشی

سری قار موگویه جور بشی بیرار



سری پیچه توره ماشی کنوم یار

سری سینه تو نقاشی کنوم یار

اموروزی که تو خانه مه بیی

سری رای توره گول پاشی کنوم یار



سفر پوشت قلایت می کنم یار

شیرین گفته صدایت میکنم یار

اگر یک شب به پهلویت بیایم

سرو جان را فدایت می کنم یار



توره آورده مهمانی کنم یار

قاشگ چشمگ پنهانی کنم یار

سر خوره د سرزانو تو بیلوم

رسم وریواج اوغانی کنم یار



مه قوربان ازو قاشا شوم یار

جلال آباد موری کوجا شوم یار

جلال آباد موری گرمی شی زوره

منه مردوم ملا متگی شی زوره



نماز شام امادوم خانه ی یار

دودست خودزدوم بر شانه یار

دودست خود زدم چیزی نگوفتی

مه قوربان دیل دیوانه ی یار



گول صدبرگ تا بستانم ای یار  
فرار از مولگ مالستانم ای یار  
ازان روزی که گشتم ازوطن دور  
جیگر پوردردودیل نالانم ای یار



بیّه آردی مو گوفتو گوی کنی یار  
آردی مو نقل رودروی کنی یار  
هرچی گله دری بیلی دما بین  
توف ونالد ددروغگوی کنی یار



سری بام بیلند استاده یار  
چرا پوشته به ما تو داده ای یار  
ماکی آشوق بد خواهت نبودوم  
مره مانده به کی دیل داده ای یار



ازو بورج وقلا شیوه شوی یار  
دعایی میکنم بیوه شوی یار  
دعای میکنم آمین بگوید

توکل با خودا از مه شوی یار



به بالا می روی شو می کنی یار

گمانم دیلبر تو می کنی یار

اگر میل دیلت در آشوقی نیست

بچی گوشتای مرّ او می کنی یار



بیایکی ماو تو پیتو کنی یار

بله دیسمال چاپی خو کنی یار

بله دیسمال چاپی گول گولستو

قول و قورون خوره از نو کنی یار



رای تیلون خوره بلو کدی یار

شال سیای خوره گردو کدی یار

تو کی مردی ازی کارا نبودی

برچی اوپال مرّه گردو کدی یار



پیرو تمبون خوره آبی کدی یار  
گوفته گوفته مره راضی کدی یار  
امی ره از دیل بیچاره مو گوم  
گب دروغه پگ راستی کدی یار



بیّه کی آردی مو قسم کنی یار  
آردی مو قسم ماکم کنی یار  
بیشنی آردی مو پالو د پالو  
غم و غصه ره از دیل کم کنی یار



سر ما بر سر زانو تو دیلبر  
دودیستای مه دتار موی تو دیلبر  
اگه مردم سری خاکم بیایی  
مگر خشنود شووم از بوی تو دیلبر



از درگه بور شدی روی تو دنیمبر  
کی غمبور میزنی زیل کبوتر  
الا یارا جان بیا غمبوره گوش کو

یکگ بوسه بیدی دیل مره خوش کو



جیل بلگگ گیرد دامون تو دوختر

توره دشوی میده اربون تو دوختر

توره دشوی میده شوی بیگانه

بیایکی ماو تو بوریم ازی خانه



عجب بیه دری اربون تو دوختر

صبا مویره توره قیرون تو دوختر

صبا مویره توره قوم بیگانه

بیایکی ماو تو بوریم ازی خانه

دوستان بسیار نازنین امید است سلام های من را قبول کنید این هم چند پارچه دوبیتی و چهار بیتی های هزارهگی را خدمت شما تهیه دیدم اگر کدام کم و کاستی داشته باشد امید است بنده را عفو کنید.